



STINAPA TA INFORMA

KON E SALIÑANAN A FORMA

E núcleo di Boneiru ta konsistí di piedra líkido (magma) ku a fria bira duru. Un di su forman ta yamá 'basalt' i e ta prosedente di erupshon di volkan bou di laman. Nos ta papiando aki di kos ku a tuma lugá mas ku 100 mion aña pasá. Miónes di aña despues e baranka gigantesko aki a kuminsá sali for di bou di superfisie di laman. Rondó di e baranka ku despues lo a bira Boneiru tabata krese un rant di koral. Koral ta traha un eskeleta di piedra di kalki, ku segun tempu tabata pasa a laga krese un rant diki di piedra di kalki. Na mes momentu si, laman tabata bati i koba bahia den e kosta moli. Riba tera áwaseru tabata sòru pa eroshon di e piedra di kalki i tabata forma seru i vaye. Asina a krese seru i vaye den e parti nort-pabou di Boneiru, terasa den e parti meimei i un paisahe plat den e parti sùit. Miónes di aña pasá e temporadanan di eis a perkurá pa nivel di laman baha i subi pa hopi tempu. E saliñanan a aparesé ora ku e awa a baha. Awa di laman ku tabata yena e bahianan i vayanen a hala atras pokopoko. Riba e frontera di vaye i laman a krese un dam natural di koral ku despues di tempu a sera e konekshon ku laman kompletamente. Despues ku hende a yega nan a kuminsá traha kas riba e 'dijknan'. Kralendijk ta e nòmber ku a derivá for di e palabra hulandes 'koralendijk'. Patras di e damnan, saliñanan i plas di awa salu a forma. E awa den e saliñanan por sali di einan pa medio di evaporashon so òf tikitiki si e lèk dor di e piedranan bai laman. Den temporada ku tin tiki áwaseru i hopi solo, e saliña por keda kompletamente seku. E salu so ta keda atras e ora ei. Ora ku den temporada di áwaseru e awa ta bin abou for di e serunan, e saliña ta yena bèk i hinter e proseso ta kuminsá di nobo. Saliñanan manera Gotomeer i Saliña di Vlijt tin un funshon importante pa lokual ta filtrashon i kolekshon di áwaseru. Nan ta prevení ku ora hopi áwaseru kai di gòlpi, tur santu ku tera ta laba bai laman, tapando e koralnan i stek nan. Pero tambe nos tin saliña ku ta trahá artificialmente pa un gran parti. Eseinan ta e saliñanan den parti sùit ku Cargill ta usa pa produsí salu. Ku dam artificial a traha bakinan gigantesko. Den esakinan por regulá e kantidat di awa ku ta drenta òf sali. Ora ku tur awa a evaporá den un di e bakinan aki, un lag diki di salu ta keda atras. Ku buldozer ta koba e salu aki i ta bent'é riba e serunan di salu karakterístiko ku nos tin parti sùit. Skirbí pa Trix van Bennekom, tradusí pa Marcel Nahr.

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURESA



Traha huntu na un desaroyo duradero pa Boneiru